

Rau Ite Imin Ru Tau Paulus Iboode Pa Timoti 2 Timoti—2 Timothy

¹ Yau Paulus. Maaron itaghton tauu loolo ve ighur ghau namin mbanjoona to Yesu Krisi. Leso navotia saveen mbuaan tooni pa tamtamon ve napaghazonai zi pa lepoogh poia tau i ighe igham pazi. Lepoogh tawe, yes tau tipaak Yesu Krisi ve tileep ila tooni, ta pale tighamu. ² O natug Timoti, yau lolog igheen tsio kat, tauta nabood rau tane ilat payo. *

Poia to Tamaan Maaron ve Tiina toit Yesu Krisi izaa tsio, ve lolozi isaghatin ghom ve tiuul ghom, ve tingin ghom uleep poia toman lolom luuma. Onoon.

Paulus ipariaan Timoti to iyooz ariaan ve ivotia vaaru poia

³ Yau nabesbees pa Maaron ve nataghton ngar tau nawataghi ila lolog naghe ene ingalaan mon ila i maata, imin muun tibugna tighamghamu. Ve mbon mataaz, matag ingalngal ghom, ve naghurghur ghom ila sunuun tsiau, ve napapait Maaron toman lolog poia pa ngar poia tau yo ughamghamu na. *

⁴ Yau matag ingal imuul ila pa saawe tau ituru tavapuli ghiit, ve naghita tanjiz tsio tomania matam suuru. Tauta napasawal payo naghe naghit ghom rigta, o igham ghau lolog poia le poia

* **1:2:** Mban 16:1+; 1Tim 1:2 * **1:3:** Mban 22:3; Pil 3:5+

kat. ⁵ Ve naghám ñgar paam pa gabuam tau yo ughur ila to Krisi kat toman lolom. Yau nawatagh: Ghuruun ila tsio, ene gabua tauu, imin to timbum liva Lois ve tinam Yunis. *

⁶ Tauta naghe napaburigin ghom muul. Leso ñgar ve tapiri tau Maaron ireii payo na igheen sorok sov, ve ugham uratoini le ivot imin tiina, imin tamtamón tiviv yav gha ighan tiina. Maaron igham tapiri ve ñgar tana payo, indeen saawe tau naghur nimag izala pavom na. *

⁷ Yo uwatagh: Avuvu tau Maaron igham pait na, ene irau igham ghiit taroi mako. I ipapalot ghiit. Leso tanjin tauun poi, tayooz ariaan, ve loloon pa tamtamón ve tagham poghani zi. *

⁸ Onoon, aazne tighur ghau naleep ila ruum to yavyavuun lolo pasaa, nataghon Krisi. Eemon ñgar tau tigham payau ne, mayam pani sov. Ve mayam pa votiaan vaaru poia to Tiina toit sov. Yo aat upariaan saveen tooni, lesó tamtamón tighur ila tooni. Ve ugham tapirim ila to Maaron, ve uyooz ariaan, ve ubaad patanani pa vaaru poia imin yau. *

⁹ Maaron, i igham mulin ghiit, ve ipoi ghiit tamin le, lesó tataghon ñgar patabuyaan. Ve iit tagham ñgar poia eta, ta i ipoi ghiit pani ne mako. I itaghon tauu lolo, ve poia tooni. Muun kat, saawe tau gabua eta ivot soone, i maata ingal pataghaan ighe igham poghania iit tamtamón tau tapaak Krisi ve taleep ila tooni. *

* **1:5:** 2Tim 3:15 * **1:6:** 1Tim 4:14 * **1:7:** Ro 8:15 * **1:8:**

Mk 8:38; Ro 1:16; 2Tim 2:3, 4:5 * **1:9:** Ro 8:28; Ep 1:4, 2:8+; 1Tes 4:7

¹⁰ Ve aazne, Uleenja toit Yesu Krisi izilam taan, gha ipaghazonjai poia to Maaron tawe ivot ighazonj, ve ipasov mateegh tapiri wa. Vaaru poia ipaghazonjai ghiit pa eez to tagham lepoogh poia ila to Maaron ve taleep mataan yaryaare le alok. *

¹¹ Maaron ighur ghau namin mbanjoonja tooni. Leso navotia vaaru poia tane pa tamtamon, ve napaghazonjai zi pani. *

¹² Puughu tane ta aazne nabadbaad patajani naol. Eemon naroi mako, ve mayag mako. Pasaa, yau nawatagh Neer tau naghur ila tooni ne, tauta naghur ila kat naghe: Vaaru poia tau i ighuru ila nimag na, i tauu pale injin poghania le irau saawe to imuul ilam. * *

¹³ O Timoti, saveenj poia tau uloonja ila yau avog, ene itotoi ghom pa saa saveenj tau yo aat upaghazonjai tamtamon pani, lesu ghuruunj ila toozi iyaryaan ve lupuunj to Krisi ilaan poia. Tauvene matam kisini ve utaghoni. Ve upaak Yesu Krisi ve uleep tunja ila tooni, ve ukis ghuruunj ila tsio ariaan, tomania ngar to loloon pa Maaron ve tamtamon. *

¹⁴ Vaaru poia tau ilat nimam na, ene gabua tauu. Tauvene matam pani ve unjin poghania. Avuvu Patabuyaanj tau ilepleep ila loloon ne, aat ipalot ghom, lesu ugham tauvene. *

* **1:10:** 1Kor 15:54+; Hib 2:14+ * **1:11:** Mbanj 9:15; Ga 1:15+; 1Tim 2:7 * **1:12:** Eez ite to tator saveenj ziiri tane, ene vene: 'naghur ila kat naghe: I pale injin poghani ghau le irau saawe tau imuul ilam. Pasaa, yau naghur taug ila niima wa'. * **1:12:** Ep 3:1+; 1Pe 4:19 * **1:13:** 2Tim 3:14+; Hib 10:23 * **1:14:** 1Tim 6:20

¹⁵ Yo uwatagh: Zetaanna to taan sirivu to Asia, tisov tighur murizi payau wa. Zeran tawe, toozi ru, ene Pigelus ve Ermogenes. ¹⁶⁻¹⁷ Eemon Onesiporus tomania yes tau tilepleep tomania ila ruum tooni na, Maaron aat loolo isaghatin zi ve iuul zi. Onoon, aazne yau nalepleep ila ruum to yavyavuun loolo, ve tikau nimag ve agheg pa sen. Eemon Onesiporus iroi mako, ve maaya payau mako. Saawe tau ilam Rom, i iliil ghau lee ilam ivot tsiau. Ve saawe naol, ilam igigig ghau, ve ipapalot ghau, ve iuluul ghau. *

¹⁸ Ve yo uwatagh: Muun, i iuul ghau kat izi nugh Epesus. Tauta naghe Mbon Murei, Maaron pale loolo isaghatini ve igham mulini.

2

Timoti irau iyooz ariaan pa badoon patanani

¹ Tauvene natug Timoti, matam ingal poia to Maaron tau taghamu ila to Yesu Krisi na. Leso ipalot ghom ve uyooz ariaan. ² Ve saveen isov tau nasavia ila eval tiina matazi ve yo uloonna na, usakia ila pa tamtamon siriv tau yo ughit zi ughe yes tirao, ve unumeer zi ughe yes pale tinizi ibees pa uraat to Maaron. Leso anazi tipaghazonai tamtamon siriv pa saveen tana, ve uraat to vaaru poia iseenga taghon gha ila. *

³ Uraat to votiaan Krisi vaaru, i le patanani. Tauvene yo aat upaak ghei ve itina tabaad patanani tane. Leso umin zaaba poia ee to Yesu Krisi. *

* **1:16-17:** Mt 25:36; 2Tim 4:16; Hib 13:3 * **2:2:** Tit 1:5 * **2:3:** 2Tim 1:8, 4:5

⁴ Yo uwatagh: Yes zaaba matazi ilala pa uraat ite paam imin tamtamon siriv ne mako. Yes tileep ila uraat to malmal mon. Leso tigham daaba toozi lolozu poia pa uraat toozi. Yo irau ugham tauvene paam. ⁵ Tamtamon tau ighe ilaan pa parlosaan tiina, i aat itaghton tutuun to parlosaan, o irau igham atuya poia to yes tau tiliiv na. *

⁶ Ighe saawe to yaun aniiñ anoonja ivot, ene aat tighur ñeer tau igham uraat tiina pa vazoghiin aniiñ na le aabu imin maata, o iduduun. *

⁷ Saveen palelaan tsiau naol tane, isaav ighe ugham ngar pazi poi, ene aat Maaron tauu ipagha-zonjai ghom pa puughu. Leso uwatagh saa ngar tau yo aat utagthoni.

⁸⁻⁹ Matam ingal Yesu Krisi irau saawe. I ivot ila sin to kinik David. I imaat, ve Maaron ipaburigini pa mateegh. Yau navovotia vaaru poia tane pa tamtamon, tauta nabadbaad patanani, ve aazne nalepleep ila ruum to yavyavuun loolo, ve tikau ghau pa sen imin yau ñeer saghati ee. Eemon saveen to Maaron, yes irau tipoon eez pani ne mako. *

¹⁰ Tauta nayooz ariaan, ve nabaad patanani isov tau igham ghau ne. Pasaa, yau naghe nauul yes tau Maaron isiigh zi timin i le na. Leso tipaak Yesu Krisi ve tileep ila tooni, ve igham mulin zi gha tileep tomania Maaron ila mbonari loolo taghon taghon gha ila. *

¹¹ Saveen tau naghe nasavia, ene onoon mon. Irau taghur ila kat:

* **2:5:** 1Kor 9:25+ * **2:6:** 1Kor 9:7, 10 * **2:8-9:** Ro 1:3; 1Kor 15:4; Pil 1:12+; Kol 4:3 * **2:10:** Kol 1:24

“Isaav ighe iit tapaak Krisi pa mateegh tooni,
ene pale taleep mataan yaryaare tomania.

12 Ve isaav ighe tayooz ariaan ve tabaad patanani
pa i eeza,
ene pale itinja Krisi tagham pooz.
Eemon isaav ighe taghur muriin pani ve
tapaisamun eeza, i aat ighur muuri pait, ve
ipaisamun ezaan paam. *

13 Saawe siriv, iit tataghon saveen mbuaan toit
tomania Krisi mako.
Eemon i, o itataghon saveen mbuaan tooni
irau saawe.
Pasaa, ngar tooni igheen pataghaan ta muun
ve ilam. Irau itortoora mako.” *

Timoti irau imin uraata poia ee to Maaron

14 Saveen tsiau tane, yau naghe yo upaburigin
tamtamon ngar toozi pani irau saawe, lesa matazi
kisini. Ve avom iyaryaan pazi ila Maaron maata,
lesa tivazorai zi pa saveen soroksorok sov. Pa
saveen tauvene, ene irau iuul ghiit rigta mako.
Ene ivaghamunia yes tau tilonloonja na. *

15 Uzuari ghom le uraat tsio isov iduduun mon
ila Maaron maata. Ve uvotia dudunjai saveen
onoon pa tamtamon itaghon ngar to Maaron. Lesa
mayam ila i maata sov, ve ighit ghom ighe yo
uraata tooni poia ee. 16-17 Saveen soroksorok to
taan tau tamtamon avozi berberia pani na, uleep
soghan pani. Pa saveen tauvene pale ipaghau

* **2:12:** Mt 10:33; Ro 8:17; 1Pe 4:13 * **2:13:** Nam 23:19; Ro 3:3+;
1Kor 1:9 * **2:14:** 1Tim 6:4; Tit 3:9

tamtamon pa eez to Maaron, ve tila tila le tisaghat kat. Ene imin moroghoon saghati tau ivot imin tiina le ivaghamunia tamtamon gha tisaghat. Zeran ru tau tisasavia saveej tauvene, ene Imeneus ve Piletus. *

¹⁸ Yesuru tipul eez to saveej onoon wa. Pasaa, tivovotia saveej karom pa tamtamon tigde: Burigiin to yes mateegha, ene ivot wa. Ve murei, burigiin ite paam muul mako. Saveej toozi tawe ivaghamunia tamtamon siriv ghuruun ila toozi wa. *

¹⁹ Eemon Maaron ipayooz lupuun tooni izala rir ariaana ee, ve ibood saveej ziiri ru izala. Ee isaav tauvene: “Maaron iwatagh yes tau timin i le na.” Ve ite isaav ighe: “Tamtamon tisov tau tivotia Yesu eeza tigde i Tiina toozi, ene yes aat tighur murizi pa ngar saghati, ve tileep soghan pani.” Saveej ru tane timin ilaal pa Maaron tamtamon tooni. *

²⁰ Ruum tiina, ene gabua maata maata imin uur ve oon tighen ilon ila. Siriv, tigharaat zi pa gol ma silva. Ve siriv, tigharaat zi pa taan ve ai. Siriv, to uraat tintiina. Ve siriv, to uraat soroksorok. *

²¹ Ene raraate mon pa iit tamtamon. Isaav ighe tamtamon eta ipul ngar saghati ileple, ve igharaat tauu leso ingalaan ila Maaron maata, i pale imin uur patabuyaan tau poia pa ghamuun uraat tintiina to Maaron. Iaat irau iuul Tiina tooni, ve igham uraat popoia maata maata. *

Ngar tau besoonja poia to Maaron ighamghamu

* **2:16-17:** 1Tim 1:4, 20, 4:7; Tit 1:14 * **2:18:** 1Kor 15:12; 2Tes 2:2+ * **2:19:** Yo 10:14, 27 * **2:20:** Ro 9:21; 1Kor 3:12+ * **2:21:** 2Tim 3:17

²² Tauvene yo uleep soghan pa n̄gar sasaghati naol tau geegeu tighamgham zi na. Ve yam̄ña tamtamon tISOV tau tisuñsuñ pa Maaron ve tibees bees pani toman lolozi n̄galaan̄a na, azuari gham le aduduun̄j ila Maaron maata ve aghur ila tooni ari-aan̄, ve lolomim pa tamtamon ve agham poghani zi, ve alup lolomim imin eemon, ve ataghon n̄gar luuma.*

²³ Eemon yes tau tikankaan pa Maaron, ve tiyauyau avozi, ve tivavazorai zi pa saveen̄ soroksorok na, upaak zi pa saveen̄ toozi sov. Pa yo uwatagh: Saveen̄ tauvene, ene ipaburigin kokaan̄ ve malmal mon.*

²⁴ Tamtamon tau ighe imin besoon̄a to Maaron, ene irau aate yavyav soroksorok ve ikokook ne mako. I aat igham poghania tamtamon tISOV ve itotoi n̄gar luuma pazi. Ve i aat le n̄gar pa uraat to paduduñaan̄ tamtamon pa Maaron aliin̄a. Isaav ighe tamtamon tigham saghatini, i irau in̄oon̄ mako. I aat itatan aate, ve ibaado mon.*

²⁵ Ve ighe tamtamon siriv tizoor aliin̄a, i aat ipaduduun̄j zi toman saveen̄ luuma. Pa ighe igham tauvene, ene pale imin eez to Maaron igham zi titoor n̄gar toozi, ve n̄gar toozi ivot gha tighazoon̄ pa saveen̄ onoon.*

²⁶ Leso tighilaal, ve tipas tauzi pa liis to Neer Saghati. Pasaa, i ta iliis zi pa liis tooni, ve ighamgham pooz pazi, lesa titaghon n̄gar tooni.

3

* **2:22:** 1Tim 1:5, 6:11; Hib 12:14 * **2:23:** Tit 3:9 * **2:24:**

1Tim 3:2+; Tit 1:7+ * **2:25:** Ga 6:1; 2Tim 4:2

Murei, tamtamon pale titagħon nġar sagħati

¹ Timoti, yau nagħe yo uwatagħ kat tauvene: Murei, pataġani naol pale tivot. *

² Pasaa, tamtamon pale lolozi pa tauzi mon, ve tighur lolozi kat pa maet. Ve tipapait tauzi ezazi tigħe tiliiv zetazġa siriv. Ve tisiksik saveeġ sasagħati pa zetazġa, ve tizoroor tamazġa ma tinazġa aliġazi. Nġar popoia tau Maaron ve tamtamon tighamgham pazi na, yes pale tighita imin kaut sorok ve lolozi iveghveegħ pani. Ve lezi roroniiġ pa Maaron mako. Pale tivelegħi imin kaut sorok. *

³ Ve yes pale lolozi pa tonvetaz toozi mako paam. Isaav igħe atezi yavyav, ene irau atezi izi rekia mako. Pale tikis aatyavyav toozi ariaaġ. Ve yes pale tiġal saveeġ naol pa zetazġa. Ve irau tiġin tauzi poi mako. Nġar toozi, ene imin gabua sagsaġa. Pasaa, lolozi isagħatin tamtamon rigta mako, ve tivagħamun zi sorok. Yes pale tighur koi pa nġar popoia ta naol ne, ⁴ ve tighur zetazġa tila koiazġa nimazi. Ve lezi gabizoonġ mako. Tila pa nagħozi mon. Ve tipapait tauzi ezazi. Tauvene yes pale lolozi igħeen to Maaron mako. Lolozi pa gabua to ulizi mon. ⁵ Yes pale tipamir tauzi tigħe titagħon Maaron nġar tooni. Eemon nġar tau tighamghamu, ene pale itotoi zi igħe yes tiwatagħ Maaron tapiri rigta mako. Zeran tauvene, yo uleep sogħan pazi. *

⁶ Tamtamon toozi siriv pale titoova to tiloġ tila ruum to yes zilivaa tau lezi ghilalooġ mako na,

* **3:1:** 1Tim 4:1; 2Pe 3:3 * **3:2:** Ro 1:29+; Jud 18 * **3:5:** Mt 7:21; Tit 1:16

ve tigham saveeņ ęgoreeņ pazi leso titaghon zi pa ęgar toozi. Zilivaa tawe, tighilaał tighes yes tigham sosor katini ve lolozi ipataņan pani. Eemon irau to tipuli mako. Pasaa, saawe isov, ęgar sasaghati maata maata ipapazaagh zi. ⁷ Yes zilivaa tauvene, lolozi tighes le tilonłooņ saveeņ tau tamtamon tipaduduun zi pani. Eemon ęgar toozi irau ivot kat pa saveeņ onoon to Maaron ne mako. *

⁸ Zeran karomņa tawe tizoroor saveeņ onoon imin muuņ Yanes yesuru Yamberes tizoor Mose. *

Neer Saghati ikau ęgar toozi kat, ve tighamgham karom pa ghuruuņ ila toozi. Tauta Maaron ighur muuri pazi wa. ⁹ Eemon uraat toozi pale irau ighur geeg mako. Pa ęgar tau muuņ ivot pa Yanes ve Yamberes na pale ivot pazi paam. Pale titoova le mako, ve eval tiina tighilaał zi tighes lezi ęgar mako imin boraņa.

Paulus ipalot Timoti muul

¹⁰⁻¹¹ O Timoti, yo upaak ghau kat, ve monmon ituru talagħlaagh. Tauvene saveeņ tau napaduduun tamtamon pani, lagħooņ tsiau, gabua tau nazuari ghau pani, ghuruuņ ila tsiau, gabuag tau nayai taug ve nayooz ariiaan pa badooņ pataņani, ve ęgar tsiau tau lolog pa tamtamon ve naghamgham poghani zi, ene yo uwatagh zi le isov. Ve pataņani naol tau tamtamon tighurghur zi payau ne, ene paam yo uwatagh zi. Muuņ,

* **3:7:** Tit 1:11 * **3:8:** Ughita Igham 7:11+. Sinain muņganazi siriv to yes Yuda isaav tauvene: Yes mura to Isip tau muuņ yesņa Mose tivatovai tapirizi na, tamtamon toozi ru ezazi Yanes ve Yamberes.

tigham saghatin ghau kat izi nugh Antiok, Ikonium, ve Listara. Eemon Maaron ipas ghau navot pa pataņani naol isov tana. *

¹² Onoon kat, tamtamon tisov tau tipaak Yesu Krisi ve titaghon dudunai Maaron ngar tooni na, tamtamon pale tighur pataņani pazi. *

¹³ Ve zeran sasaghatizi ve zeran karomņa tau tipaghau tamtamon pa eez to Maaron na, ene pale tinoknok ghamuņ ngar toozi saghati tawe ila ila le imin tiina kat. Tauvene karom toozi pale igherev tamtamon gha tisosor pa eez to Maaron. Ve tauzi tisapir pani paam. Pasaa, tighur ila ngar karom.

¹⁴ Eemon yo irau matam kisin saveeņ onoon tau uloņa ve ughur ila na, ve utaghoņi. Pasaa, yei tau nipaghazoņai ghom pa saveeņ tana na, yo uwatagh ghei wa. *

¹⁵ Saawe tau yo kukuam ve ilam, utum tomania Maaron aliņa patabuyaņ tau tiboode na. Saveeņ tana, ene irau ipaghazoņai ghom pa Maaron ngar tooni, lesu ughazoņ kat pa eez tau i igham mulin ghiit pani. Eez tana, ene tauvene: Isaav ighe taghur ila to Yesu Krisi ve tapaak ila tooni, ene aat taleep poi. *

¹⁶ Maaron aliņa isov tau tiboode na, ene Maaron Avuvu ipaburigin tamtamon, tauta tiboode. Saveeņ tooni, ene iuluul ghiit to tapaduduņ tamtamon ve tapaghazoņai zi pa Maaron ngar tooni. Lesu tiwatagh saveeņ onoon,

* **3:10-11:** Mbo 34:19; Mbaņ 13:50, 14:5, 6, 19; Pil 2:22 * **3:12:**

Yo 15:18+; Mbaņ 14:22; 1Tes 3:3 * **3:14:** 2Tim 2:2 * **3:15:** Mbo 119:105, 130

ve tighilaal sosor toozi ve tipuli, ve titaghon ngar duduunja mon. *

¹⁷ Tauvene isaav ighe Maaron tamtamon tooni eta iwatagh katin saveen tooni, i pale irau kat pa ghamuun uraat popoia ta naol ne.

4

Paulus aavo iyaryaan pa Timoti

¹ Tiina toit Yesu Krisi, pale imuul ilam, ve itotoi pooz tooni ivot ighazoon, ve igabiiz tamtamon tisov ve ighur atuya pazi. Yes tau tileep matazi yaryaare, ve yes mateegha paam. Yau avog iyaryaan payo ila yesuru Taama Maaron matazi naghe: *

² Uvotia Maaron aliinja pa tamtamon irau saawe. Isaav ighe uleep ila saawe poia ve tamtamon lolozi pa lonjaan ghom, ma uleep ila saawe saghati ve timbuzir pa saveen tsio, na yo aat uyooz ariiaan pa badoon patanani, ve upaduduun zi poi. Uvotia saveen karom ve ngar saghati to tamtamon ivot ighazoon, ve avom iyaryaan pazi leso tipuli. Ve upalot zi to titaghon Maaron ngar tooni. *

³ Pa murei, saawe eta pale ivot, mako tamtamon lolozi pa lonjaan saveen duduunja tau itaghon Maaron ngar tooni ne mako. Taliñazi pale imonmoon pa lonjaan saveen soroksorok. Tauvene yes pale tiyau zeran karomja katini tilam ve tighur zi timin paduduñaan pazi. Pasaa, yes tiwatagh:

* **3:16:** Ro 15:4; 2Pe 1:20+ * **4:1:** Mbanj 10:42; 1Pe 4:5 * **4:2:** 1Tim 4:13; 2Tim 2:25; Tit 2:15

Zeran tawe pale tipul zi titaghon tauzi lolozi ve n̄gar toozi. *

⁴ Saawe tana ighe ivot, tamtamon pale tipoon talin̄azi pa saveen̄ onoon to Maaron ve tighur mur-izi pani, ve tighur talin̄azi pa sisiin̄ soroksorok.

⁵ Eemon yo aat atem imaat ve ugham n̄gar poi irau saawe, uyooz ariaan̄ pa badoon̄ patañani, ve uvotia vaaru poia pa yes tau tighur ila soone na. Tinim ibees pa uraat tau Maaron ighuru ila nimam na, ve ugham uratoini le anooña ivot. *

Paulus saawe tooni to ipul taan ilam igharau wa

⁶ Pasaa, saawe tsiau to napul taan, ene ilam igharau wa. Malau mako pale sin̄ig imalin̄ imin vaen tau tilin̄i izala watoon̄rau paavo. *

⁷ Yau n̄parav ariaan̄ pa vaaru poia gha naliiv wa. Yau n̄pariaan̄ ghau le rigmon mako napasov parlosaan̄ tsiau tane. Ve ghuruun̄ ila tsiau, ene nakiskisi soone. *

⁸ Tauvene atuya poia to yes tau tiparav ariaan̄ gha tiliiv na, tauta isasaan̄ ghau. Atuya tawe, ene vene: Saawe to Mbon̄ Murei, Tiina toit tau gabizoon̄ tooni duduun̄a na, pale ighit ghau ighe yau n̄eer duduñag. Ve yau mon mako. Tamtamon tisov tau lolozi pani, ve tighe le tighita muleen̄ tooni, ene i pale igham n̄gar raraate mon pazi. *

Paulus ipasul Timoti ighe ila ighita rekia

⁹ O Timoti, utoova to ulam rekia. ¹⁰ Pasaa, gabua to taan tane irav Demas maata gha ipul ghau, ve

* **4:3:** 1Tim 4:1 * **4:5:** 2Tim 1:8, 2:3; 1Pe 1:13 * **4:6:** Pil 2:17

* **4:7:** 1Kor 9:24+; 1Tim 6:12; Hib 12:1 * **4:8:** Yems 1:12; 1Pe 5:4; Syg 2:10

ighau ila pa nugh Tesalonika wa. Ve Kresenes, i ila pa taan sirivu to Galesia, ve Titus paam ila pa taan sirivu to Dalmatia wa. *

¹¹ Ve Lukas zigani tauta yeiru nilepleep. Tauvene naghe ugham Markus, ve yamru alam. Pasaa, i irau iuul ghau kat pa uraat to Maaron. *

¹² Tikikus, yau nambaano ilat pa nugh Epesus wa.

¹³ Nonoghiina tsiau to ngoaan, napuli igheen ila Karpus ruum tooni izi nugh Troas. Saawe tau ughe ulam, mako matam ingali ve ughamu ilam. Ve ugham rau tsiau tilam paam. Ve rau tau tigharaat zi pa ngai uuli na, matam ingal zi kat ve ugham zi tilam. Lolom iveegh pazi sov.

¹⁴ Aleksander tau neer to gharatoon gabua pa mbaras ve ain na, i igham ngar saghati tau ivaghamun ghau kat. Ngar tau ighamu na, murei Maaron tauu aat iyatu. ¹⁵ Tauvene matam imoos poi pani. Pasaa, i izoor saveen tsiei kat. *

¹⁶ Saawe imin maata tau tipayooz ghau to naghazonai taug pa uraat tsiau, tamtamon eta iyooz murig ve ipariaan saveen tsiau mako. Mako kat. Tisov timoghaagh payau. Eemon yau nasun Maaron naghe maata kisin sosor toozi ve iyatu sov. ¹⁷ Onoon, yau zigau. Eemon Maaron ileep tomani ghau ve ipalot ghau. Tauta navotia katin vaaru poia pa yes tau Yuda mako na, gha tisov tiloona. Saawe tana, naghe pale namaat. Eemon mako. Maaron iuul ghau, ve ipas ghau navot ila laion aavo. ¹⁸ Ve yau naghur ila ariaan naghe i aat igham mulin ghau pa ngar sasaghati naol isov tau

* **4:10:** Kol 4:14; 1Yo 2:15 * **4:11:** Mban 15:37+; Kol 4:10, 14

* **4:15:** 1Tim 1:20

tamtamon tighē tigham payau na, ve maata payau poi lee igham ghau nala naleep tomania izi nugh tooni sambam. *

I eeza tiina kat pa tapiri ve poia tooni. Tauvene pakuruuŋ toit aat iŋaruini irau saawe. Ta aazne ve taghon taghon gha ila. Onoon.

Paesiŋ siriv to Paulus

¹⁹ Ugham aaz poia tsiau pa Prisila yesuru Akwila, ve Onesiporus tomania yes tau tileep tomania ila ruum tooni na paam. *

²⁰ Erastus, yau napuli ileep izi nugh Korin. Ve Tropimus, i imorooŋ gha napuli ileep izi Miletus. *

²¹ Timoti, utoova to ulam rekia. Pasaa, malau mako pale nugh isaghat ve yaunŋa tiina ivot.

Eubulus, Pudes, Linus, ve Klaudia, tomania toŋvetaz to Krisi tisov tau yeŋa nilepleep ne, yes tigham aaz poia toozi payo.

²² Timoti, Tiina toit pale ileep tomani ghom, ve poia tooni iza to yam asov. Onoon.

* **4:18:** Mbo 121:7 * **4:19:** Mbaŋ 18:2+; 2Tim 1:16+ * **4:20:** Mbaŋ 19:22, 20:4, 21:29

**Maaron Saveen Tooni Patabuyaang
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.**

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 22 Feb 2024 from source files dated 31 Aug 2023

adb844f0-d769-5b05-9dd0-7c01fca938bb